

- लोकसभा अध्यक्ष रो चुनाव काले-एनडीए री कानी सुं भाजपा सांसद ओम बिरला जदकि विपक्षी इंडिया गठबंधन री कानी सुं कांग्रेस सांसद के. सुरेश नामांकन भर्यो।
- 18वीं लोकसभा रे पैले सत्र मांय आज भी नुवा बण्या सदस्या री शपथ व्ही- प्रदेश रा भी सगळा सांसद शपथ ग्रहण करी। ।
- दक्षिणी-पश्चिमी मॉनसून राज्य मांय प्रवेश कर्यो-कोटा अर उदयपुर संभाग रे केई ठौड़ां माथे बिरखा।
- मुख्यमंत्री भजनलाल शर्मा देश अर प्रदेश री उन्नति मांय युवावां री भूमिकां ने खास बतायो।

0000

लोकसभा अध्यक्ष रो चुनाव काले होवेला। भारतीय जनता पार्टी रा वरिष्ठ सांसद ओम बिरला राष्ट्रीय जनतांत्रिक गठबंधन- एनडीए रा उम्मीदवार व्हेला, जदकि विपक्षी इंडिया गठबंधन लोकसभा अध्यक्ष पद खातिर कांग्रेस रा सांसद के. सुरेश ने आप रो उम्मीदवार बणायो है। दोन्यु उम्मीदवार अध्यक्ष पद खातिर आज आप रो नामांकन भर्यो। अध्यक्ष रो चुनाव काले व्हेला। ईण सुं पैल्या, सरकार अर विपख ईण पद खातिर आम सहमति बणावण मांय असफल रिया। संसद रे बारे मीडिया सुं बातचीत मांय केंद्रीय मंत्री पीयूष गोयल कह्यो के केंद्रीय मंत्री राजनाथ सिंह, अमित शाह अर जगत प्रकाश नड्डा इण मुद्दे माथे कांग्रेस रा नेता के0सी0 वेणुगोपाल अर डी.एम. के नेता टी0 आर0 बालू रे साथै बैठक करी। विपख रा नेता श्री बिरला री उम्मीदवारी माथे समर्थन देणे सुं पैल्या उपाध्यक्ष रे नाम री घोषणा करणे माथे जोर दे रिया हा। ईण सुं पैल्या कांग्रेस रा सांसद राहुल गांधी कह्यो की विपख, अध्यक्ष उम्मीदवार ने आपरो समर्थन देणे खातिर तैयार है, पण उपाध्यक्ष पद खातिर विपक्षी पार्टी रो उम्मीदवार होणो चाहिजे। ध्यानजोग है की लोकसभा अध्यक्ष रो चुनाव पैली लोकसभा बगत सुं ई निर्विरोध होतो रीयो है पण ओ पैली बार है जद इण पद खातिर चुनाव हो रीया है। ईण बीच 18वीं लोकसभा रे तहत दूजे दिन भी नुवां बण्या सांसदां री शपथ रो सिलसिलों जारी रह्यो। कोटा सांसद ओम बिरला आज शपथ ली। ईणी तरह भीलवाड़ा रा सांसद दामोदर अग्रवाल टोंक-सवाईमाधोपुर सांसद हरीश मीणा, भरतपुर सांसद संजना जाटव, पाली सांसद पी.पी. चौधरी साथे प्रदेश रा दूजां सांसद भी शपथग्रहण करी।

000

केन्द्रीय जांच ब्यूरो-सी बी आई बिहार, गुजरात अर राजस्थान मांय राष्ट्रीय पात्रता सह प्रवेश परीक्षा-नीट यू.जी. मांय कथित अनियमिततावां रा पांच मामलां री जांच सरू करी दी है। सी बी आई गुजरात अर बिहार मांय नुवां सिरे सुं एक-एक मामलो दर्ज कर्यो है। वठिने राजस्थान मांय भी तीन मामला दर्ज कर्या गया है। ईण बीच महाराष्ट्र हैलथ यूनिवर्सिटी री वी.सी. माधुरी कानिटकर पढेसर्या सुं निश्चिंत रहणे री अरज करी है। वणा आश्वासन दियो कि सगळा स्तरां माथे पारदर्शिता राखता व्हीया प्रवेश प्रकिया पूरी सत्र सुचारू रूप सुं सरू कर्यो जावेला।

000

कृषि विश्वविद्यालय कोटा रो 7 वों दीक्षांत जळसो आज राख्यो ग्यो। जळसे री अध्यक्षता राज्यपाल अर कुलाधिपति कलराज मिश्र करी। जळसां मांय 310 पढेसर्यां ने उपाधियां बाँटी गयी, जिण मांय 185 छात्र अर 125 छात्रांवां भेळी है। 10 पढेसर्यां ने सोने रा तमगा दिया गया। राज्यपाल श्री मिश्र ईण मौके माथे कह्यो की कृषि खेतर मांय निरन्तर आ री नुवी तकनीक रो लाभ काश्तकारां ने मिलणो चाहिजे अर ईण काम मांय कृषि विश्वविद्यालय महत्ती भूमिका निभा सके है।

000

हरिदेव जोशी पत्रकारिता अर जनसंचार विश्वविद्यालय रो दूजो दीक्षांत समारोह 29 जून ने राख्यो जावेला। जयपुर मांय होवण वाळां इण कार्यक्रम री अध्यक्षता राज्यपाल कलराज मिश्र करेला जदकि उप मुख्यमंत्री प्रेम चंद बैरवा मुख्य अतिथि होवेला। विश्वविद्यालय री कुलपति प्रो सुधि राजीव बतायो कि दीक्षांत जळसा मांय विश्वविद्यालय रा नुवां बण्यां भवन रो वर्चुली उद्घाटन भी कर्यो जावेला।

आकाशवाणी समाचार जयपुर री कानी सुं प्रादेशिक समाचार बुलेटिनां मांय तीन नुवां आपराधिक कानूनां रे बारा मांय जागरूकता लाणे रे लखस सुं श्रृंखला चलायी जा री है।

नुवां आपराधिक कानूनां रे जरिये एक समान न्याय प्रणाली लागू व्हेला। ईण सुं न्यायिक प्रकिया मांय बेहतर तालमेल रे साथै बेगो ही न्याय पक्को व्हे सकेला। नुवी व्यवस्था मांय तीजी श्रेणी रा न्यायिक मजिस्ट्रेट, मेट्रोपॉलिटन मजिस्ट्रेट अर सहायक सत्र न्यायाधीशां रा पदां रो उन्मूलन हो जावेला। अबे चार प्रकार रा न्यायिक अधिकारी व्हेला। शुरुआती पद द्वितीय श्रेणी न्यायिक मजिस्ट्रेट रा व्हेला। ईण रे पाछे

प्रथम श्रेणी न्यायिक मजिस्ट्रेट फेर प्रथम न्यायिक मजिस्ट्रेट अर सत्र न्यायाधीश रो पद व्हेला। ईण रे अलावा कार्यकारी मजिस्ट्रेट भी व्हेला। ईण पूरी व्यवस्था रो लखस न्यायिक प्रक्रिया मांय तेजी लावणो है, क्योंकि नुवां कानूनां मांय बहस पूरी होणे रे 30 दिन रे मांय-मांय न्यायिक अधिकारी ने फैसलो देणो व्हेला।

000

दक्षिण-पश्चिम मॉनसून प्रदेश मांय प्रवेश कर लियो है। मौसम केन्द्र जयपुर रा निदेशक राधेश्याम शर्मा आं जाणकारी दी। वणा बतायो की मॉनसून दक्षिण-पूर्वी हलकां सुं प्रदेश मांय प्रवेश कर्यो है।

इण बीचे न्यारा-न्यारा ज़िला सुं म्हाणा खबरनवीस बिरखा रा समचार भेज्या है। सवाईमाधोपुर मांय काले रात सुं रूक-रूक र बिरखा व्हे री है। बांसवाड़ा, उदयपुर, मांय बरसात व्ही। दौसा अर करौली मांय आज तेज बिरखा व्ही। भरतपुर मांय दोपहरां पाछे चौखी बिरखा व्ही। बाड़मेर अर बालोतरा मांय आज तेज आंधी रे साथै बरसात व्ही। बिरखा होणे सुं आमजन ने थोडी घणी राहत मिली। सिरौही ज़िला रा आबूरोड, माउंट आबू अर शिवगंज साथै दूजी जगावा माथे भी बिरखा व्ही उधर जैसलमेर, चूरु अर आसेपासे रा इलाकां मांय तेज गर्मी अर उमस सुं जनजीवन प्रभावित हो रह्यो है। इण बीच मॉनसून रे चालता सवाईमाधोपुर रा रणथम्भौर बाघ अभ्यारण्य मांय अवैध चराई माथे रोक रे लगस सुं धारा 144 लागू करी ज्यी है।

000

मुख्यमंत्री भजनलाल शर्मा कह्यो कि देश अर प्रदेश री उन्नति मांय मोटयारां री भूमिका घणी खास होवे है। आज मुख्यमंत्री निवास माथे अखिल भारतीय विद्यार्थी परिषद रा प्रतिनिधि मण्डल सुं मुलाकात रे चालता वणा कह्यो की युवा, महिला, किसान, गरीब ऐडा चार वर्ग है, जकां रे उत्थान खातिर राज्य सरकार लगेतार काम कर री है। वणा आश्वस्त कर्यो की राज्य सरकार बेटियां रे साथै-साथै बेटां ने भी आगे बधने रा पूरा मौका देवेला। मुख्यमंत्री कह्यो कि आवण वाळे पूर्ण कालिक बजट मांय युवावां रे कल्याण अर सशक्तिकरण खातिर न्यारा-न्यारा निर्णयां ने भेळो कर्यो जावेला।

000

अलवर मांय प्रधानमंत्री आवास योजना शहरी रे अन्तर्गत नगर निगम री कानी सुं लाभार्थी संवाद कार्यक्रम राख्यो ग्यो। ईण रे चालता लाभार्थियां ने चैक भी बाट्या ग्या। लाभार्थी इण योजना खातिर केन्द्र सरकार रो घणो आभार जतायो।

000

जैसलमेर जिले रा रामदेवरा मांय तालाब मांय डूबणे सुं आज एक मोटयार री मौत व्हे ग्यी। आज सुवारां श्रिद्धालु राम सरोवर तालाब मांय मोटयार रे शव ने देख्यो जिण रे पाछे सूचना मिलणे पर पुलिस मौके माथे पहुंच र युवक रे शव ने बारे निकळवायो।

000

श्रीगंगानगर ज़िला मांय शुद्ध आहार मिलावट माथे वार अभियान रे तैत अबे तांई लगे-टके 27 हजार किलो खाद्य पदार्थ सीज करणे रे साथै दो सौ चार सैंपल लिया गया है। अवधि पार मिल्यां 800 किलो खाद्य पदार्थो ने नष्ट कर्यो ग्यो है। इण रे चालता 32 मिलावट खोरां रे खिलाफ अदालत मांय वाद दायर कर्यो गयो। जिण माथे कोर्ट निर्णय देता थकां मिलावट करणे वाळां आं लोगां माथे 13 लाख रूपये सुं बत्ती रो जुर्मानो लगायो है।

000

केंद्रीय उपभोक्ता कार्य, खाद्य अर सार्वजनिक वितरण मंत्री प्रहलाद जोशी गन्ने रा टिकारु अर विविध उत्पादन खातिर वैश्विक सहयोग रो हेलो कर्यो है। दिल्ली मांय 64 वीं अंतर्राष्ट्रीय गन्ना संगठन-आईएसओ परिषद री बैठक रे चालता एक कार्यशाला मांय श्री जोशी कह्यो कि किणी योजनां रो कार्यान्वयन करते थकां उपभोक्ता, काश्तकारां अर उद्योग रे हितां मांय संतुलन थापित करणो जरूरी है।

000

वित्तमंत्री निर्मला सीतारमन ने आज नुवी दिल्ली मांय व्यापार अर सेवा खेतर रा प्रतिनिधियां रे साथै सातवीं बजट पैल्यां परामर्श बैठक री अध्यक्षता करी। बैठक मांय केंद्रीय वित्त राज्य मंत्री पंकज चौधरी, मुख्य आर्थिक सलाहकार वी0 अनंत नागेश्वरन, वित्त सचिव टी.वी सोमनाथन, व्यय महकमां रा सचिव, आर्थिक कार्य महकमां रा सचिव अर वाणिज्य तथा उद्योग मंत्रालय भागीदारी करी।

000